

ANG BUHI NGA CRISTO

ANG PANAKSIHON SANG MGA APOSTOLES

THE CHURCH OF JESUS CHRIST OF LATTER-DAY SAINTS

Samtang ginasaulog naton ang pagkabun-ag ni Jesucristo sang nagligad nga duha ka milenya, ginadulot namon ang amon panaksihon sang pagkamatuodtuod sang Iya indi matupongan nga kabuhi kag sang wala'y dulonan nga birtud sang Iya dako nga nagapasag-uli nga halad. Wala na sing iban pa nga may subong nga indi-matungkad nga impluwensya sa tanan nga nagkabuhi kag magakabuhi pa sa ibabaw sang duta.

Sia ang Dakong si Jehova sang Daan, ang Mesias sang Bag-ong Katipan. Sa idalom sang direksyon sang Iya Amay, Sia ang tagtuga sang duta. “Ang tanan nga butang ginhimo niya, kag sa wala sia wala’y bisan ano nga nahimo sang ginhimo” (Juan 1:3). Bisan pa nga wala’y sala, ginbunyagan Sia sa pagtuman sang bug-os nga pagkamatarong. Sia “naglibot nga nagahimo sing kaayuhan” (Mga Binuhatan 10:38), apang gintamay tungod sini. Ang Iya ebanghelyo isa ka mensahe sang paghidaet kag maayong kabubut-on. Naga-agda Sia sa tanan sa pag-sunod sang Iya halimbawa. Naglatas Sia sa mga dalanon sang Palestina nga nagapang-ayo sang mga masakiton, nagatuga sang mga bulag nga makakita, kag nagapabalik sang mga minatay sa kabuhi. Nagpanudlo Sia sang mga kamatuoran sang wala’y katapusan, sang pagkamatuodtuod sang aton pagkabuhi sang wala pa kita mabun-ag, sang katuyuan sang aton kabuhi sa duta, kag sang ikasangkol para sa mga anak nga lalaki kag mga anak nga babayi sang Dios sa kabuhi nga magaabot.

Ginsugdan Niya ang [ordinansa sang] sakramento bilang pahanudom sang Iya dako nga nagapasag-uli nga halad. Gindakop Sia kag ginpamatbatan sa butig nga mga panumbongon, ginhukman sa paglipay sang magamo nga kadam-an, kag ginpamatbatan nga mamatay sa krus sa Kalbaryo. Ginhatag Niya ang Iya kabuhi sa pagpasag-uli para sa mga sala sang tanan nga tawo. Ang Iya ginhimo isa ka dako nga salili nga dulot para sa tanan nga magakabuhi pa sa ibabaw sang duta.

Maligdong nga nagasaksi kami nga ang Iya kabuhi, nga amo ang sentro sang tanan nga maragtas sang tawo, wala magsugod sa Betlehem ukon nagtapos sa Kalbaryo. Sia ang Panganay sang Amay, ang Bugtong nga Inanak sa unod, ang Manunubos sang kalibutan.

Nabanhaw Sia gikan sa lulubngan agud “mangin panganay sang mga nagakatulog” (1 Mga Taga-Corinto 15:20). Bilang Nabanhaw nga Ginuo, nagduaw Sia sa tunga sadtong ginpalangga Niya sa kabuhi. Nag-alagad man Sia sa tunga sang Iya “iban pa nga mga karnero” (Juan 10:16) sa dumaan nga Amerika. Sa moderno nga kalibutan, Sia kag ang Iya Amay nagpakita sa lamharon nga si Joseph Smith, nga nagpasugod sang madugay na nga ginpanaad nga “dispensasyon sang kabug-usan sang panahon” (Mga Taga-Efeso 1:10).

Parte sa Buhi nga Cristo, ang Manalagna nga si Joseph nagsulat nga ang Iya mga mata kaangay sang dabdab sang kalayo; ang buhok sang Iya ulo maputi subong sang puraw nga nieve; ang Iya dagway nagasilak sing labaw pa sa kasanag sang adlaw; kag ang Iya tingug kaangay sang tunog sang nagadaganas nga dakong mga tubig, nga sa pagkamatuod amo ang tingug ni Jehova, nga nagasiling nga

Sia ang una kag ang katapusan, nga buhi Sia, nga Sia ang ginpatay, kag nga Sia ang aton mananabang sa Amay (tan-awa sa D&C 110:3–4).

Ang Manalagna nagpahayag man nga pagkatapos sang madamo nga mga panaksihon nga ginhatag parte sa Manluluwas, ginahatag niya ini nga panaksihon, katapusan sa tanan: Nga ang Manluluwas buhi!

Kay ang Manalagna nakakita sa Iya sa tuo nayon nga kamot sang Dios kag nakabati sang isa ka tingug nga nagapahayag sang pamatuod nga Sia ang Bugtong nga Inanak sang Amay—

Nga paagi sa Iya, kag sa kalalangan Niya, kag tungod sa Iya, ang mga kalibutan yara karon kag gintuga, kag ang mga pumoluyo sang mga ini mga inanak nga lalaki kag mga inanak nga babayi sang Dios (tan-awa sa D&C 76:22–24).

Ginapahayag namon sa mga pulong nga maligdong nga ang Iya pagkapari kag ang Iya Simbahan napanumbalik na sa duta—“gintukod sa mga sadsaran sang . . . mga apostoles kag mga manalagna, nga si Cristo Jesus iya amo ang pangulong bato sang pamag-ang” (Mga Taga-Efeso 2:20).

Nagasaksi kami nga sa pila ka adlaw magabalik Sia sa duta. “Kag ang himaya sang Ginuo igapahayag, kag ang tanan nga unod makakita sini sing tingob” (Isaias 40:5). Magadumala Sia bilang Hari sang mga Hari kag magagahum bilang Ginuo sang mga Ginuo, kag ang tagsa ka tuhod magaluhod kag ang tagsa ka dila magadayaw sa pagsimba sa atubang Niya. Ang tagsa sa aton magatindong agud hukman Niya suno sa aton mga binuhatan kag sa mga handum sang aton mga tagipusuon.

Nagapahayag kami sang panaksihon, bilang Iya nagakaigo nga ginordinan nga mga Apostoles—nga si Jesus amo ang Buhi nga Cristo, ang wala’y kamatayon nga Anak sang Dios. Sia ang dako nga Haring Emmanuel, nga nagatindog karon sa tuo nayon nga kamot sang Iya Amay. Sia ang kasanag, ang kabuhi, kag ang paglaum sang kalibutan. Ang Iya alagyan amo ang banas nga nagapadulong sa kalipayan sa sini nga kabuhi kag kabuhi nga wala’y katapusan sa kalibutan nga magaabot. Pasalamatan naton ang Dios tungod sa indi matupongan nga dulot sang Iya diosnon nga Anak.

ANG UNANG PANGULUHAN

Joseph Smith
Thomas Morgan
James H. Faust

January 1, 2000

ANG KORUM SANG NAPULO'G DUHA KA MGA APOSTOLES

Boyd K. Packer
L. Tom Perry
Dwight H. Petersen
Neal A. Maxwell
Russell M. Nelson
Dallin H. Oaks

M. Russell Ballard
Joseph B. Wirthlin
Richard G. Scott
Robert D. Hales
Jeffrey R. Holland
Henry A. Eyring